

**AWIG AWIG
DESA ADAT TENGGULAK KELOD**



**DESA ADAT TENGGULAK KELOD
DESA KEMENUH, KECAMATAN SUKAWATI,
KABUPATEN GIANYAR**

OM AWIGNAM – ASTU NAMASIDYAM
AWIG-AWIG DESA ADAT TENGGULAK KELOD.

Krama Desa Adat Tengkulak Kelod duk Paruman Ring Rahina Redite Umanis, Wara Merakih Sasih Kapat caka Warsa 1991. Tanggal Masehi 16 Oktober 1989, gilik saguluk saha susrusa ngemanggehang Awig-awig tertulis sekadi ring sor puniki.

MURDHA-CITA

Desa Adat waluya wantah pesasuban Krama Desa lan kulawarga pawongania. Manut dresta Desa Adate kapanggihang BHuana Agung, pawongania soang-soang pinaka Bhuana Alit. Adung patemon BHuanane kalih larapang santa jagadita, sinanggeh murdaning prayojana angriptaning Awig-awig. Sotaning Bhuana Agung, Desa Adate wantah pawakan Bhawa Maurip jangkep saha Tri Hita Karana luwire :

- a. PARAHYANGAN : Sehanan khayangan panyiwian Desa Adate genah ngarcana Hyang, maka Atma Desa Adate`
- b. PAWONGAN : Warga Desa Adate sami pawakan Trikaya, mawinan Krama Desa Adate sida molah maprawerti.
- c. PALEMAHAN : Tanah saha dagingnia sajeroning wawengkon Desa Adate, sinanggeh anggasarira tawulan Desa Adate.

Sejaba dresta inucap, pamekas Pancasila, UUD 1945 lan sehanan peraturan-peraturan Negara Republik Indonesia punika tan maren manggeh kainggilang, tan wenang ketepasin antuk awig-awig puniki.

SARGA I

ARAN LAN WAWIDANGAN DESA

PAWOS 1

- 1) Desa adat puniki mewasta Desa Adat Tengkulak Kelod`
- 2) Jebag kakuwub wawidangania mewates nyatur :
 1. Ring sisi WetanTukad Petanu.
 2. Ring sisi Kidul Banjar Batusepih
 3. Ring sisi Kulon Desa Mas.
 4. Ring sisi Lor Wewengkon Desa Adat Tengkulak Tengah
- 3) Desa Adat Puniki kewangun antuk 184 paos karang ayahan Desa`

4) Sejawaning Desa sane munggah ring ajeng, wenten taler sane kewastaning Kerama Banjar, inggih punika sehananing wong Desane sane sampun mejangkepan/merabian, taler patut makrama.

5) Banjar puniki kepeah kedadosang 3 (tigang) Banjar Tempekan Luwire:

1. Banjar Tempek Samuan Tiga..
2. Banjar Tempek Tengkulak Kelod.
3. Siki Kepala Dusun.

6) Kakuwub wewidangan Desane manut dresta luwire:

1. Papulan karang paumahan sinanggeh palemahan Desa Pekraman.
2. Setra, Carik miwah Tegal ring kakuwub wawidangan Desa sejebaning palemahan Desa Pekraman manggeh telajakan Desa.

7) 1. Awig – Awig Perarem miwah sehanan paswaran Desane, manggeh kajejerang ring kakuwub wawidangan Desane sami.

2. Awig –Awig miwah Perarem Subak ring telajakan Desane, tan maren manggeh kainggilang.

SARGA II

PATITIS LAN PAMIKUKUH

PAWOS 2

Desa Adat Tengkulak Kelod puniki ngemanggehang pamikukuh minakadi:

1. Pancasila
2. Undang – Undang Dasar 1945, pamekas pasal 18
3. Tri Hita Karana, manut tatwa miwah sada cara Agama Hindu.

PAWOS 3

Patitis Desa Adat Tengkulak Kelod luwire :

1. Mikukuhin miwah ngerajegang Sanghyang Agama.
2. Nginggilang tata prawetine meagama.
3. Ngerajegang kasukertan Desa, saha pawongania sekala lawan niskala.
4. Ngerajegan tata sangaskaraning pawongan, pamekas sane ngiket pakulawangan.
5. Ngerajegang kaukertan seraja druwening Desa miwah druwening pawongan sami.

SARGA III

PALET 1

INDIK KRAMA

PAWOS 4

- 1) Sane kabawos Kerama Desa, inggih punika kulawarga sane megama Hindu sane ngamong Karang Desa miwah Karame sane magenah jenek

wiadin madunungan sajeroning palemahan DESA ADAT TENGGULAK KELOD.

2) Sejaba punika sinanggah tamiu.

PAWOS 5

Kerama Desa Adat Tengkulak Kelod puniki wenten 4 (petang) pawos luwire :

- 1) Kerama Ngarep, inggih punika kaluwarga sane ngamong karang Ayahan Desa.
- 2) Kerama Ngempi, inggih punika kaluwarga sane tan ngamong karang ayahan Desa
- 3) Kerama Balu, tegesnia kerama ngarep utawi kerama ngempi silih tunggil lanange utawi istrine sampun lampus.
- 4) Karma Tapukan, inggih punika :
 1. Kerama sane during antes ngayah katinggal olih yayah reania gumentos antes ngayah.
 2. Sane sampun pecak ngayah polih tempo asangkepeng raris tedun ngayah
 3. Kerama tapukan mamungkul utawi nyibakan, yan sentanania sampun antes ngayah, sakemawon kantong masakolah, kekaninin pamopog manutin ungguhan lan perarem

PAWOS 6

Ngawit dados kerama Desa/Banjar Adat.

- 1) Mawiwit ngamongin karang ayahan Desa
- 2) Mawiwit jumenek sajeroning palemahan Desa Adat Tengkulak Kelod
- 3) Melarapan antuk pawiwahan pretisentana(1) miwah (2) ring ajeng
- 4) Sehanan warga Desa sane jumenek ring wewengkon Desa Adat Tengkulak Kelod, patut sainut ring kecaping Awig-awig lan perarem sane sampun kemanggehang.

PAWOS 7

Panemayan tedun makerama Desa/Banjar Adat :

- 1) Melarapan antuk pawiwahan kekawitin ring rahina:
 - a. Sangkepan Desa Adat (Coma Kliwon)
 - b. Taur Kesanga
- 2) Perarem/perjanjian/pemutus, yaning bekas ayah duk merarian antuk becik-becik, malih mewali ngayah keni pemopog 2 karung beras
- 3) Yaning wenten pendatang baru, utawi numas tanah ring karma adat iriki keni pemopog 4 karung beras
- 4) Yaning wenten ayah melanciran taler keni pemopog 4 karung beras

- 5) Yaning wenten ayah makaon saking karma iriki nenten polih napi-napi

PAWOS 8

Sehanan Kerama Desa Sami keni ayah sekadi ring sor:

- 1) Ayah Ngarep saking kerama ngarep, keni ayah miwah pawedal mamungkul.
- 2) Ayah Ngempi saking kerama ngempi, keni ayah manut perarem miwah pewedal manut wiguna
- 3) Ayah Tekel (pangrombo) saking kerama balu, keni ayah miwah pawodal manut pawongania, napike lanange utawi istrine sane lampus. Prade balu ngalintik, keni ayah nyibakin, sakemawon ya ayah lanang utawi istrine sane nenten ngayahang, punika kekenin pamopog manutin pararem. Yening balu punika ngempu, sang balu punika keni ayah mamungkul yan prade empu-empuane sampun antes ngayah
- 4) Ayah Roban ; pemargin ipun sang sane ngrobin utawi ngajak patut nguningan ring pangurus, turmaning sang sane kaerobin patut nginutin awig-awig kerama iriki
- 5) Prade rikalaning ngayah wenten sinalih tunggil kerama matilar sadereng puput karya, wenang kerama inucap keni pamidenda tanjeklaler utawi tinggaltarung manutin paswara

PAWOS 9

Kerama Desa Kedadosang :

- 1) Mapawangkid utawi tan tedun ;
 1. Rikala Ngakerebin :
 - a. Piasan
 - b. Gedong/Meten
 - c. Bale Dangin
 - d. Jineng/Kelempu
 2. Meyadnya sanistania antuk banten Rosan,sasuwen ipun tedunan apisan, sejawaning ring rahinan Tumpek wariga (Tumpek Pengarah), Galungan lan Tumpek Kuningan
 3. Piodalan ring Pamerajan/sanggahnia salami tedunan apisan
 4. Rikalaning nunas bawos (Memasar) selamania arahina
 5. Rikalaning matepetin sungkan sane magenah ring dura Desa
 6. Rikalaning matepetin sungkan sajeroning paumahan, sesampun wenten kebebasan saking parajuru
 7. Rikalaning ngater anak sungkan
 8. Rikalaning kesengan ring sang Rumawos

9. Pacang ngemargiang utusan Desa/Banjar sane mabuat, arahina sadereng memargi

10. Ngingsirang puri/umah selamin ipun arahina

- 2) Nyade utawi nyuksukin sane kawenangang sesampun manggeh Deha Taruna utawi meresidayang nganutin kerama
- 3) Melaga utawi ngentosin ayah-ayahan antuk arta berana manut paetangan, menawitan kajudi antuk sang maweng rat utawi sane mabuat lianan sesampun polih kebebasan saking I kerama Desa
- 4) Agung Alit pemelagane inucap keanutang ring perarem
- 5) Yan wenten silih tunggil kerama sampuun werda tur katah madruwe sentana, wenang I kerama Desa nyudi silih tunggil sentanania mangda nyade/ngayah/nyeledihin sang werda inucap

PAWOS 10

Wusan dados Kerama Desa luwire:

1. Sangkaning pinunas ngeraga, menawi kesah kadura Desa utawi ngelangkungin segara
2. Sangkaning kanoranang, duwaning sampun tan prasida ngezehin salah, maprawerti setata nguwig kecaping awig-awig

Sang uwusan makerama :

1. Patut ngaturang karang Ayahan ke Desa
2. Tan polih pah-pahan sekancan padruwenan Desa
- 3.

PAWOS 11

Indik Ayah

Kasinanggeh tamiu kapalih kedadosang kalih pawos :

Sane meagama Hindu :

1. Ngerawuhin pakulawargania sane wenten ring Desa Adat Tengkulak Kelod, arep mawirasa miwah ngaturang bakti ring Khayangan sane wenten ring sajeroning Desa Adat Tengkulak Kelod, polih wenang wantah 42 rahina. Yan prade langkungan ring punika patut keni beya pecalang ngangken ngesasih manutin perarem.
2. Sane nenten meagama Hindu, menawita :
Mawirasa utaw ngerereh karya, waluya kasinanggeh tamiu saha patut nganutin kecaping (1) ring ajeng.

PAWOS 12

Swadarmaning Kerama Desa/Banjar Adat miwah tamiu luwire :

1) Kerama Desa/Banjar Adat :

1. Dreda atuwang ring Desa/Banjar
2. Tinut ring Daging Awig-awig, Perrarem lan paswaran Desa
3. Tan maren ngutsahayang mangde Dsa/Banjar wiadi jagate gemuh landuh kertha rahajeng

2) Tamiu :

1. Tinut ring tatiwak Desa ngupadi sikerta sokala
2. Tan wenten tungkas ring sapamargin kertin Desane

PAWOS 13

Patuwas wiadin olih-olihan Kerama Desa/Banjar Adat :

1. Polih pesayuban Parajuru, ngemanggehang patitis Pawos 5 ring ajeng, kabawos tur katiwakin pamutus sehananing wicaranya
2. Nyarengin paruman Desa//Banjar Adat saha wenang mastikayang pamutus bebawos.

PALET 2

INDIK PARAJURU DESA

PAWOS 14

- 1) Desa Adat Tengkulak Kelod kaenter antuk Bendesa Adat
- 2) Banjar Adat kaenter antuk Kelihan banjar Adat
- 3) Bendesa lan Kelihan patut mawiwit saking kerama ngaep, tan cedangga tur uning ring aksara
- 4) Bendesa Adat keadegangmelarapan antuk pemilihan nyabran 5 (lima) warsa, sajewaning wenten parindik tiwos tur kangkat kapilih malih, miwah maduluran Dewa Saksi (Mawinten) ring Pura Desa
- 5) Kelihan Banjar Adat keangkep olih Kepala Dusun/Banjar, keadegang melarapang paingkup kerama Banjar, Kepala Desa, miwah Camat manutin Undang-undang, saha madulurang Dewa Saksi (Mawinten) ring Pura Dalem
- 6) Sinoman utawi saya kemanggehang manut ririgan, tur megentos nyabran ngesasih nangen pesangkepan

PAWOS 15

1) Bendesa Adat Kesanggra antuk :

1. Petajuh
2. Penyarikan, pinaka juru surat
3. Arta raksa, pinaka juru raksa jinah
4. Kasinoman/Saya janggi, pinaka juru arah lan ngewacak I Kerama Desa

2) Kelihan Banjar kesanggra antuk :

1. Penyarikan, pinaka juru surat
 2. Artha raksa, pinaka juru raksa jinah
 3. Petajuh sane ngelaksanayang upakara yadnya
 4. Petajuh sane ngelaksanayang wewangunan
 5. Sinoman/Saya janggi, pinakan juru arah lan ngawacak I Kerama Banjar
- 3) Sajeroning ngenterang kasukertan niskala, Bendesa Adat miwah Kelihan Banjar patut nginggilang Pemangku, Kubayan lan Penyarikan Pura

PAWOS 16

- 1) Swadarmaning Bendesa miwah Kelihan :
 1. Ngelaksanayang/ngenterang daging awig-awig miwah perarem Desa/Banjar
 2. Ngenterang/ngetangang padruwen Desa/Banjar
 3. Nuntun/ngenterang padruwean Desa/Banjar, ngupadi kasukertan sekala niskalaanut patitis
 4. Nuntun saha nyaksiang tatacara sangaskaraning kauripane mabuat sane ngilitang sulur pakulawangan
 - Adat siki Banjar Adat
 - Banjar Tengkulak Kelod
 5. Mawosin kalih niwakang pamutus wicara mantuka ring I Kerama sami
 6. Maka duta Desa/Banjar matemuang bawos ring sapisira ugi
- 2) Swadarmaning Penyarikan :

Ngelaksanayang pailikitan miwah sareng ngenterang kerahajengan I Kerama Desa/Banjar
- 3) Swadarmaning Pemangku :
 1. Ngenterang Pujawali ring Khayangan manut gegambelan
 2. Nitenin wiadin nuntun kasucian khayangan
 3. Ngelaksanayang/ngenterang Yadnya manut sepakoning Bendesa/Kelihan
- 4) Swadarmaning Kubayan :

Nuntun Pemargin Agama/Adat lan Padowasan sajeroning Desa-Desa Adat ring sor :

 1. Desa Adat Tengkulak Kelod
 2. Tempekan Samuan Tiga
- 5) Swadarmaning Saya/Sinoman :

Ngelaksanayang sepakoning Parajuru
- 6) Swadarmaning Pecalang

Maka patelik sukertan Desane

PAWOS 17

Sesanan Kubayan, Pemangku lan Penyarikan Pura :

- 1) Yan pecalang ngewalat rabi, wenang ngaturang rumuhun pawintenania ring Pura genahnia mawintenan nguni, tembenia wawu wenang ngewalat rabi, riurinia wenang ngewana wasa a tahun suwenia, irika malih ngawitin mawinten sekadi upakarania nguni
- 2) Ambek Dharma Sadu, suci nirmala, pageh ring sastra utama
- 3) Tan wenang pati pikul-pikulan, tan wenang kaungkulan ring warung banjakarma, tan wenang umungguh ring soring tetarub cemarayuda, tan wenang ajejuden, tan wenang aparek ring saluwiring naya dusta, tan griganing wong awakeh
- 4) Yen mawihara, tan wenang anayub upadrawing cor, teka wenang Adewa Saksi

PAWON 18

Yaning Parajuru nilar swadarma utawi sesana, keni pamidanda nika 1 ring dosaning Kerama manut dudonan, saha kengin kawusang manut perarem.

PAWOS 19

Tatacarane ngelaksanayang swadarma muang sesana tan maren keanutang ring Awig-awig, Perarem, Dresta miwah Paswarman Desa Muang Banjar.

PAWOS 20

Parajuru kegentosin riantukan :

- 1) Seda/Padem
- 2) Kanorayang dawning iwang pemargi utawi nilar sesana
- 3) Wit saking pekayun rahayu patut sajeroning paruman tur kaingkupin antuk I kerama Desa/Banjar

PAWOS 21

Patias utawi Olih-olihan Parajuru Desa luwire :

- 1) Luput saluwiring reramon
- 2) Polih pengangkepan salueirin duman
- 3) Patias tiosan manutin perarem

PALET 3

INDIK KULKUL

PAWOS 22

- 1) Kulkul ring Desa Adat Tengkulak Kelod wenten 4 (petang) pawos :
 1. Kulkul Desa Adat
 2. Kulkul Banjar Adat
 3. Kulkul Subak

4. Kulkul aekeha-sekeha

2) Tatepakan Kulkul Banjar matios-tiosan manut tatujon :

1. Tengeran ngayah : Atalud alon
2. Tengeran ngemedalang rare : Tung2, Tung2, Tung2
3. Tengeran kulkul kelayuan sekar : 3 kentong, 2 kentong
4. Tengeran kulkul nganten : 3 kentong, 3 kentong, 1 kentong
5. Tengeran kulkul umah puun : 3 tulud bulus
6. Tengeran kulkul kemalingan : kentong : 3, 3, 3, bulus
7. Tengeran kulkul jatme ngamuk kentong : 2, 2, 2, (bulus)
8. Tengeran nimbang rare : duang tulud, lambat (nambah)
9. Tengeran ngurugan tedunan : 3 kentongan lambat

3) Tabuh tatepak kulkul Desa taler matiosan manutin tatujon :

1. Tengeran Wali : nungting rikalaning Ida Bhatara katuwur, masucian, mapepadan, ngaturang puja wali muang nyineb
2. Tengeran tedun ngayah : kalih tulud lambat

PAWOS 23

- 1) Kukul Desa utawi Banjar tan wenang katepak yan tan sangkaning pituduh parajuru, sejawaning tengeran kepancabayan
- 2) Sang nepak kulkul tan sangkaning pitutudh, patut digelis atur supeksa maka buatan panepake, yan tan mangkana, wenang sang mamurug keni pamidanda manut perarem
- 3) Kukul sekeha-sekeha semalih kulkul pondokan tan kalugra nyawerin (matehin) sukat utawi tengeran kulkul Desa/Banjar, yan kapurug taler keni pamidanda manutin pararem.

PALET 4

INDIK PARUMAN

PAWOS 24

1) Paruman/Sangkepan ring Desa Adat Tengkulak Kelod luwire :

1. Paruman Desa/Banjar/Subak kawentenang :
 - a. Nyabran ngesasih, makacihna tanpa arah-arah, dawning sampun panemaya manut perarem soang-soang
 - b. Napkala (padgatakala) maka jalaran kulkul entenan manut tatujon
2. Sangkepan Kerama Desa lan subak kawentanang nangken rahina Coma Kliwon
3. Sangkepan Kerama Banjar kewentanang nangken rahina manut wiguna
4. Sangkepan Parajuru Desa/Banjar/Subak kawentanang manut wiguna

5. Sangkepan sekeha-sekeha kawentanang manutin babuat

2) Paruman Desa utawi Banjar madudonan sekadi ring sor :

1. Prasida lumaksana risampun ketedunin antuk sang patut ngamiletin, kemanggalain antuk tengeran kulikul, saha abusana sergep tur nyungklit tan kalugra makta kekaryan sambil sakaluwire
2. Tan maren ngarcana ring Ida Bhagawan Penyarikan maka sarana Widhi Widhana Cana
3. Maserana antuk Janggi maka pengawit kelaksanayang pemyacak sep-sepan saha kelanturang antuk nyacak dedosan ageng alit manut perarem
4. Tan kayogya ngawetuaken swara gora utawi byuta, yan hana mangkana keni pamidanda beya pecamil kadi dandaning nguman-uman ring sabha
5. Pamutus bebawos beriuk sepanggul (Ingkup) punika sane kemanggehang
6. Sehananing bebawos sane sampun keputusang ring paruman mewastu wenten silih tunggil kerama ngucapang pamutus paruman punika nenten patut, wenang wong inucap kekaninin pamidanda pecamil kadi dandaningnguman-uman ring sabha

3) Prade daging paruman punika nenten kaingkup, mangda parajuru Desa ngutsahayang ngilikang bebawose, saha pamutusnia mangda keraremin antuk I Kerama Desa, bilih tan prasida kasungkemin jantos ping tiga, wenang I Parajuru nunasang ring Sang Rumawus

PAWOS 25

1) Sajaroning paruman Desa, Bendesa patut nambiakang pemargin pangantere, pamekas nganinin indik :

1. Ngunjuk lungsur pekrama saha ayah-ayahan, sulur artha brana padruwean Desa miwah sane lian-lianan
2. Pamutus paruman Desa sinanggeh perarem maka pamitegep awig-awig

PAWOS 26

- 1) Paruman Parajuru Desa kawenangania wantah ngerincikang pengerencana usaha Desane kapungkur
- 2) Paruman Parajuru Desa tan kawenang ngamedalang tategenang ring I Kerama Desa sadereng Kaingkup sajeroning sangkepan Desa
- 3) Pamutus paruman Parajuru Desa sane mawiwit pituduh Sang Mawangrat, taler kasinaggeh paswara

- 4) Paruman Parajuru kawentenang sanistane ngenem sasih apisan bilih-bilih kengin padgata manut wiguna

PAWOS 27

- 1) Pasangkepan sekeha-sekeh kawentenang ngesasih utawi padgatekala manut tatujon wigunania soang-soang
- 2) Nangken sangkepan sekeha patut atur supeksa rihin ring Parajuru Desa utawi Banjar mangda prasida tan lempas ring patitis pawos 5 (lima) ring ajeng

PALET 5

INDIK DRUWEN DESA

PAWOS 28

Padruwen Desa Adat Tengkulak Kelod kawentenanipun sekadi ring sor :

-Khayangan luwire : Pura Puseh, Pura desa, Pura dalem Kalih :

Dalem Baleran, Dalem Delodan, Pura Ulun Suwi

-Pura Pengajengan, Pura taman, Pura Alas Arum, Pura Beji, Pura Penataran

-Balai Banjar kalih :

-Balai Banjar Tengkulak Kelod

-Balai Banjar Samuan Tiga

-Pekarangan Desa katah ipun : 147 karang

Setra wenten kekalih

-Setra Tengkulak Kelod,

-Setra Samuan Tiga

-Laba Pura merupa carik :

-Dwe Laba Pura Pengajengan magenah ring Subak Alas

-Dwe Laba Pura Puseh magenah ring Subak Alas

-Dwe Laba Dalem magenah ring Subak Alas

-Dwe Laba Pura Penataran magenah ring Subak Enggong

-Dwe laba Pura Dalem Pasung Grigis magenah ring dauh carik Mangku Dalem Pasung Grigis

-Laba Pura sane merupa Tanah Tegal

-Dwe Pura Puseh magenah ring sisin Tukad Petanu

-Dwe Pura Puseh magenah ring dangin Pura Puseh

-Dwe Pura Desa magenah ring dangin tegal

-Dwe Pura Desa magenah ring Delod Pura Penataran

-Dwe Pura Penataran sami magenah ring baler kangin Pura Batu Gaing (sari)

-Dwe Pura Dalem magenah ring :

1. Baler Mrajapati

2. Baler Tunon (seme)

3. Dangin Pura Dalem

-Dwe Pura Taman, sami magenah ring Dangin Pura taman kantos dangin Jalan

-Dwe Pura Dalem Pasung Grigis Sami magenah ring Dauh Tunon

PAWOS 29

- 1) Parajuru Desa wenang ngatangang upon-upon Laba Pura lan sapenunggilan druwen Desane
- 2) Pikolih lan upon-upon Laba Pura keanggen prabea piodalan saha wewangunan Pura
- 3) Nyabran pesangkepan Desa, Bendesa/Kelihan nguningayang parindikan ngunjuk lungsur padruweane ring I Kerama Desa/Banjar
- 4) Sakaluwiring padruwen Desa/Banjar patut wenten ilikitania
- 5) Tan kalugra ngadol utawi ngesahang padruwen Desa yan tan kasungkemin \antuk I Kerama Desa/Banjar

PALET 6

INDIK SUKERTA PAMITEGEP

KARANG, TEGAL LAN CARIK

PAWOS 30

- 1) Kerama Desa pangamong Karang Desa. Patut ngewatesin karang inucap antuk pagehan/turus utawi tembok mangda pekantenania asri
- 2) Wates sisi kaler miwah kangin kekaryanin antuk sang ngamong karang inucap, reh punika mawasta gegaleng kaluwan
- 3) Prade keranayang pagehang/turus inucap ngelikadin, yan sami arsa penyandinge, kangin watese ngangge pinget kewanten
- 4) Prade wenten karang kabembeng, patut kautsahayang olih I Parajuru mangda wenten pemarginipun

PAWOS 31

- 1) Tegal miwah carik patut megaleng ring genahne soran
- 2) Wates carik miwah tegal kangin ngangge pagehan, yan kaprasida mangda ngangge balok beton saking Kantor Agraria

PAWOS 32

- 1) Sinalih Tunggil Kerama Desa/Banjar tan kalugra :
 1. Ngelah-alah margi, karang ayahan Desa, Tegal miwah carik
 2. Ngalah-alah tanah tegak Kahyangan, Setra miwah sekancan trgak sane kasinanggeh suci
- 2) Prade wenten melaksana kadi munggah ring ajeng inucap (1), angka keni pamidanda manutin perarem saha ngewaliang sane kealahang punika miwah prade manut (1)angka 2, sejawaning keni pamidanda

kadi ring ajeng, taler mawuwuh keni upakara pamerayascita sane matetujon ngewaliang kesucian tanah inucap

PAWOS 33

- 1) Sinalih tunggil Kerama Desa tan kalugra ngadol wiadin ngantahang pekarangan utawi tanah Desa, riantukan tanah punika kebanda antuk ayahan
- 2) Karang wiadin tanah Desa punika dados kaserahang ring anak lian kemawon sang nerima paserah punika yogya nerima ayahan sekadi patut ipun
- 3) Silih tunggil Kerama Desa sane celed ring ayah wenang katiwakin pamidanda manutin paswara. Yaning jantos awarsa celed ring ayah miwah pawodal nenten sangkaning panugraha Parajuru desa, wenang karang wiadin tanah Desa punika kadaut olih I Kerama Desa

PEPAYON

PAWOS 34

- 1) Ngawit nandur pepayon tanem tuwuh sukat ipun nenten kirang ring adepa agung (1,5meter) ngajeroang saking wates. Prade wenten jantos ngalintangin wates wenang kesepatgantungan
- 2) Yaning wenten tetanduran ngungkulin mewastu mayanin kapisaga patut sang kaunggulin digelis ngewara antuk paiguman selantur ipun prasida sang nruwenang taru punika digelis ngebah utawi notor
- 3) Prade sampun kaware taler tan wenten usaha sang nruwenang wit taru punika, sang rumaksa katetehan/kajerihan wenang mesadok ring Parajuru, tur sesampun keparitetes yukti sekadi pengaloke, wenang I Parejuru ngandikayang mangda sajeroning tigang rahina wit taru punika kekawonang. Yan sang madruwe tiwal ring pamutus Parajuru,, wenang sang katetehan utawi kajerihan ngaonang wit taru punika saha nggambil tarunia.
- 4) Sane keni pamidanda penyangaskaran saha prabea manutin pararem mekadi ipun
 1. Sang nruwenang wit taru sinanggeh mayanin, prade pungkak ngarubuhin wewangunan anak tiwos
 2. Sang notor, munggul wiadin ngebah taru prade pungkak tur ngerubuhin padruwen anak tiwos
- 5) Prabeya penyangaskaran, inggih punika :
 1. Yan kemargiang sajeroning tigang rahina, kengin antun ayam berumbun asiki sakadulurania
 2. Yan langkungan ring tigang rahina patut kemargiang antuk Mancasata

3. Sehananing sane karubuh/karusak patut kabacikang malih olih sang ngarubuh/ngarusak

WEWANGUNAN

PAWOS 35

- 1) Yan pacing mapawangunan patut :
 1. Masadok ring Parajuru, yan prade wewangunan punikanganinin wates
 2. Ngangge sukat asta Bumi miwah gegulak Asta Kosali sanistania manut ring Patitis niskala
 3. Tan kayogya nyayubin kepisaga
- 2) Prade wewangunan punika jantos nyayubin bilih-bilih tembok ring telenging wates, risampun keware taler nenten karinguang mewastu indik punika ngalantur kesadokang ring Parajuru wenang sang madruwe wewangunan punika keni pamidenda manutin perarem saha tembok inucap kagubar utawi sanistane mangda kekaryanang abangan

WEWALUNGAN

PAWOS 36

- 1) Warga Desa sane miara sluwiring wewalungan patut sayaaga nitenin nengul utawi ngelogor mangda nenten ngarusak karang utawi pabianan kerama tiwos bilih-bilih jantos ngeranjing ngaletihin Kahyangan
- 2) Prade wenten wewalungan malumbar wiadin ngeleb ngarusak pekarangan/pabianan kerama tiwos risampun kerama taler nenten keringuang, kengin wewalungan punika ketaban, sang madruwe wewalungan punika keni pamidanda ngewaliang sane karusak miwah nawur panebas wewalungan sane ketaban punika manutin paswara. Yan sang madruwe wewalungan punika nenten mresida nebas, wenang wewalungan punika kadrebe antuk sang neban
- 3) Prade jantos ngaletihin genah patut kasuciang minakadi Pura,pemerajan/Sanggah miwah sane lianan,risampun kapirates antuk Parejuru wenang sang nruwenang wewalungan punika kekaninin pamidanda artha lan pemerayascita manut paswara

BHAYA

PAWOS 37

- 1) Sane kasinanggeh Bhaya luwire : Jiwa Bhaya, Artha Bhaya, Geni Bhaya, Duracara ring Agama
- 2) Sang manggihin sehanan Jiwa Bhaya patut nepak kulkul bulus anut Pawos 24 (2)

- 3) Prada ring Desa kehanan Jiwa Bhaya, patut I Kerama Desa ngaturang pemerascita manutin paswaran tur sang mayanin katur ring sang ngawewenang

PAWOS 38

- 1) Sang manggihin kehanan artha bhaya (kemalingan) patut digelis nepak kulkul anut ring pawos 24(2), utawi Sang kemalingan atur nguningayang ring sang rumawos
- 2) Yaning wenten jatma ngeranjing ring pakubon wiadin pekarangan wenang jatma punika ketuwekin, yan tan minangken wenang katiwakin Dewa saksi ring Pura manutin paswaran
- 3) Manda tan ketuwekang manut riang ajeng, asing-asing ngeranjing ring kubon anak lian patut :
 1. Matengeran suara (Mekaukan)
 2. Nyantos sang nruwenang karang gumentos rawuh, utawi mesadu ring pengapitnyane sane pinih tampek, maka buatan pengeranjinge
 3. Pamedal karangnia kedagingin sawen, makacihna wenten pengarah rikala suwung

PAWOS 39

- 1) Warga Desa sane kaicalan/kemalingan prade pacing maseserep nunas kebebasan miwah panuntun ring Kelihan Banjar
- 2) Prade genahe maseserep ngelangkung ke Banjar tiwosan, patut nunas kebebasan utawi uwak-uwakan ring Kelihan Banjar irika mangda tatacarane maseserep manut kad drestane

PAWOS 40

- 1) Sehanan warga Desane prade polih nuduk barang sekaluwire mangda atur uninga ring Kelihan Banjar
- 2) Kelihan Banjar nyobiahang barang dedudukan punika mangda sang nruwenang sida mewali ngamolihang. Sang mariangkenin patut nyidayang nyihnayang mungguing barang punika gumati wantah padruwenia
- 3) Prade jantos tigang sasih tan wenten anak ngelingan wenang katur ring sang sane ngewiwenang

PENYANGGRAN DESA/BANJAR

PAWOS 41

Penyanggran Kerama Desa/Banjar rikala ngawentenang karya suka duka luwire:

- 1) Prade ngawentenang Panca Yadnya sane mabuat

- 2) Ngerombo tan pesangu sekatah ipun wantah ping tiga, selangkung ipun patut katuran pangu
- 3) Pangu irika Pitra Yadnya anut abot dangan Yadnyane, Prade saking semeng jantos wengi katurang pangu ping kalih

SARGA IV

SUKERTA TATA AGAMA

PALET 1

INDIK DEWA YADNYA

PAWOS 42

- 1) Palinggih panyiwian sane wenten ring wewidangan Desa Adat Tengkulak Kelod :

1. Khayangan Tiga, Pura Desa/Bale Agung, Pura Puseh, miwah Pura Dalem
2. Pura Pengajengan
3. Pura Taman
4. Pura Alas Arum
5. Pura Beji
6. Pura Ulun Suwi
7. Pura Penataran

- 2) Rahina piodalalan sowang-sowang Khayangan inucap kadi ring sor :

1. Puja wali ring Pura Puseh lan Desa lan Beji Desa nuju rahina Budha Wage Menail
2. Puja wali ring Pura Dalem, Beji lan Prajapati Nuju rahina Buda Wage Langkir
3. Puja wali ring Pura Dalem Pasung Grigis nuju Anggara Kasih (Kliwon) Wuku Medangsia
4. Puja wali ring Pura Pengajengan nuju Anggara Kasih (Kliwon) Wuku Tambir Taler wali ring Alas Arum
5. Puja wali ring Pura Taman nuju Budha Kliwon Wuku Sinta
6. Puja wali ring Pura Ulun Suwi/Batu gaing nuju Budha Umanis Perangbakat
7. Puja wali ring Pura Penataran nuju Anggara Kliwon Juluwangi
8. Puja wali ring Panti Pasek Sanak Pitu, Budha Umanis Perangbakat
9. Puja wali ring Panti Tektok, Anggara Kasih Kulantir

PAWOS 43

- 1) Ring soang-soang Pura inucap patut kawentenng Pemangku
- 2) Ngadegang Pemangku, Kubayan lan Penyarikan Pura manut dudonan :

1. Nyanjan utawi Masembung, mapiteges mapinunas ring ajeng penataran Pura wiadin ke Dura Desa menawi ring Balian Konteng lan sapenunggilania
 2. Turunan utawi Ngewaris
 3. Kapilih antuk I Kerama Desa melarapan antuk ngaturang sedah lelekesan sane silih tunggil ring sajeroning lekasan punika medaging pinget sane kabuatang (Kubaya, Pamangku utawi Penyarikan). Saha upakara sergep sesampun kapiuning raris keambil olih soang-soang Kerama.. sane ngeniang lekasan medaging pinget sane kabuatang punika wantah sane keadegang
- 3) Tan kawenang keannggeang Kubayan, Pemangku miwah Penyarikan luwire :
1. Cedangga
 2. Naen ngelaksanayang 'SAD ATATAYI'
 3. Sang sapisira ugi sane tan kapatutang manutin pararem
- 4) Prabea kapemangkuan, Kubayan lan Penyarikan Pura Luwire :
1. Adiksa Widhi (Ngawintenang) kamedalin saha kelaksanayang olih sang ngadegang (Kerama)
 2. Riwekas yan prade Pemangku, Kubayan lan Penyarikan Pura Seda,, wenang sang ngadegang sane kayogya ngawedalin saha muputang upakara lan upacara samu. Nanging wirangnyane ring kaluwangan Pemangku, Kubayan lan Penyarikan punika taler kawenang ngelaksanayang upakarania

PAWOS 44

- 1) Pemangku lan Kubayan ngenterang upacara piodalan ring kahyangan utawi ring soang-soang paumahan
- 2) Yan Pemangku/Kubayan lempas ring sesana miwah dharmaning kepemangkuan wenang katiwakin pamidanda manutin paswara
- 3) Prade silih tunggil Pemangku miwah Kubayan kapiambeng utawi cuntaka kengin nyelang Pemangku tiwosan. Yangtan wenten Pemanku, wenang Bendesa ngemargiang Pujawali

PAWOS 45

- 1) Pemangku, Kubayan lan Penyarikan kagentosin riantukan :
 1. Seda
 2. Pinunas ngeraga menawi kageringan lan sapenunggilania
 3. Kawusan antuk Kerama riantukan lepas ring sesame miwah dharmaning kepemangkuan

- 2) Prade Pemangku, Kubayan lan Penyarikan Pura kawusang sangkaning melaksana asta dusta keni pamidanda manut perarem saha ngewaliang prabea pawintenane nguni

PAWOS 46

Kasukertan Kahyangan mekadi ring sor :

- 1) Tan kalugra ngeranjing ke Pura luwire:
 - a. Sebel//kandel/ngeraja sewala salami dereng mabersih
 - b. Sebel madruwe putra salami :
 - Kulawarga sejeroning pekarangan gumentos kepus odel
 - Renaning rare 42 rahina (Akambuhan)
 - Yayah lan kulawargania sajeroning apaon 12 rahina
 - c. Sebel pengantenan salami dereng mesakapan
 - d. Cuntaka sangkaning kepademan manutin sengker
 1. Sami sane wenten ring ajeng sang katiben catur Cuntaka, mekadi sebel saking ngeraga
 2. Makta sehanan barang sinanggeh ngaletihin
 3. Sato agung sejawaning rikala mapepadan
 4. Mabuana tan patut kadi tatecaraning ngeranjing ke Pura
 5. Sadereng polih uwak-uwak (Pituduh) Parajuru Desa
- 2) Pari polah sane tan kewenang ring Pura :
 1. Masumpah (Cor) sejawaning pituduh jurun Desa
 2. Makebotan/makoratan, mewarih, masenggama, makolem dados asiki lanang wadon, nyangsang busananing wong, matutang wastra lan pusungan, marebat/mejaljal, ngopak, mamisuh, manusu wong rare
- 3) Sang mamurung kecaping ajeng keni pamidanda pamerayacita manutin paswara

PAWOS 47

- 1) Yaning wenten anak kerawuhan ring Pura kangin kapintonan melarapan antuk kedagingin geni baha kau-kau sapanginang suwenia ring pangkonania, yang prade rumasa kesinangsayan, pamidanda manutin perarem
- 2) Prade ring kahyangan kehanan durmanggala minakadi kepencabhayan Pemangkunia patut digelis nyadokang ring Parajuru mangda maruman Keramania tur ngawentenang pamarayascita sepatutnia

PALET 2

INDIK RESI YADNYA

PAWOS 48

- 1) Sejawaning Pemangku, sang pacing madeg pandita utawi pinandita minakadi Balian Konteng, Dalang sakeluwiring jagi ngenterang yadnya patut mesadok ring Bendesa miwah ring Parisadha Hindu Dharma
- 2) Parajuru patut ngawas nitenin tur naweng ngalangin prade wenten kacihnian sasar kakecap miwah dresta, tur sareng nyaksinin upakara saha nyarwakang ring paruman Desa tegap rawuhing wates kawenangnia ngenter Yadnya

PAWOS 49

- 1) Pemangku patut ngeriyinang upacarane ring wawidangania soang-soang sesampune punika puput wawu dados muputang ring genahelian

PALET 3

INDIK PITRA YADNYA

PAWOS 50

Pemargin Pitra Yadnya madudonan manut sekadi ring sor :

- 1) Pangupakara sang kelayusekaran :
 1. Upakara mapendem / sinuruping siti
 2. Upakara makingsan ring geni / pertiwi
 3. Upakara atiwa-tiwa (ngaben/palebun)
- 2) Upacara riwusan Ngaben/Palebun kelanturang antuk upacara Ngerorasan lan Nyekah / Ngasti

PAWOS 51

Swadharma lan tategenan rikala wenten sinalih tunggil Kerama kelayusekaran :

- 1) Sang kaduhkitan patut :
 1. Nyadokan ring Kelihan Banjar tur nunas tetimbangan ring kewentenania
 2. Ngaturin I Kerama Banjar ngerombo makarya eteh-ete sarwi kadulurin penyanggran canang (Basa) sasidan
- 2) Swadharmaning Kelihan Banjar
 1. Kelihan Banjar maritetes pemargin sang kaduhkitan napike pacing kapendem, makingsan utawi ngelantue keabenang
 2. Prade pacang kapendem, makingsan utawi keabenang pengriyin utawi padewasane ring Jero Kubayan sesampune tinas raris wawu katapakang kulkul manutin pawos 24 (3)2 olih I Kelihan Banjar utawi Peatajuhnia
- 3) Penyanggran I Kerama Banjar selanturnia yan prade sakemawon mapendem utawi makingsan inggih punika :

1. Beras 1 kilo
 2. Jinah manutin perarem
 3. Ngaryaning upacara lan eteh-ete sawa
 4. Ngater ke Setra gumentos puput mapendem utawi mageseng
- 4) Tan kengin ngalelet langkungan ring tigang rahina sejawaning Pemangku, Kubayan lan Penyarikan

PAWOS 52

- 1) Atiwa-tiwa utawi Ngaben kelaksanayang antuk :
 1. Nyawa Resi utawi Nywasta Geni
 2. Sawa Prateka
- 2) Pemargin Attiwa-tiwa mekadi ring sor :
 1. Sajeroning amasa wenang ngewangun wantah apisan
 2. Yan wawu lampus sejawaning pemomong sejeroning amasa taler wantah apisan
 3. Yaning pamomong minakadi Pemangku Pura, Kubayan lan Penyarikan Pura wenang kemargiang patetiwan satunggil wenten sane seda tan wenang pinendem
- 3) Dudonan patetiwan ngawit saking wawu seda utawi ngulapin/ngeplugin, ngeseng jantos pengiriman

PAWOS 53

Patus lan penyanggran Banjar :

- 1) Pawedal patus saking I Kerama Banjar inggih punika :
 1. Beras patus keantugang ring katah/kidik kakedengan Banjare duaning punika keangge penyanggran Banjar
 2. Ayam (pitik) 10 ukud tunggil asawa
 3. Gesing 5 katih tunggil asawa (saking sang mmadruwe sawa) sakirang ipun kawedalin antuk I Kerama Banjar
- 2) Kekaryan sane dados amongan I Kerama Banjar :
 1. Eteh-ete upacara lan upakara
 2. Wadah lan patulangan
 3. Ngater ke Setra sha ngelaksanayang sehananing karya sane wenten kilitan ipun ring patetiwan inucap gumentos puput

PAWOS 54

Pangingun Banjar : mungguwing panguing ring I Kerama Banjar wantah keanutang ring abot dangan karyane inggih punika :

- 1) Rikala mekarya sanganan ping kalih, benjang pengutangan ping kalih, ring ngutangane apisan, ring nyagiange apisan
- 2) Rikala mekarya sanganan apisan, benjang pengutangan ping kalih, ring ngutangane apisan, ring nyagiange apisan

- 3) Rikala mekarya sanganang apisan, benjang pengutangan apisan, ring ngutangane apisan, ring nyagiange apisan
- 4) Ring mekarya sanganane tan pesangu, benjang pangutangan ping kalih, ring pangutangan apisan, ring nyagiange apisan
- 5) Ring mekarya sanganane tan pesangu, benjang pangutangan apisan, ring pangutangan apisan, ring nyagiange apisan
- 6) Ring pangutangan apisan, ring nyagiange apisan
- 7) Ring pengutangane apisan

PALET 4

INDIK CUNTAKA LAN SENGKERNIA

PAWOS 55

- 1) Cuntaka sangkaning seda/padem :
 1. Yang dereng makupak :
 - a. Sang kaduhkitan ngawit saking wawu lampus jantos 12 rahina saking padewasan mapandem
 - b. Kerama Banjar ngawit saking wawu lampus jantos 3 rahina saking padewasan
 2. Yan sampun makupak :
 - a. Sang kaduhkitan ngawit saking lamps jantos 42 rahina saking padewasan mapandem
 - b. Kerama Banjar ngawit saking wawu lampus jantos 3 rahina saking padewasan mapandem
 3. Yan sang sampun makupak ngelantur kaabenang utawi ngewangun :
 - a. Sang kaduhkitan ngawit saking wawu lampus utawi yan ngewangun ngawit saking wawu ngeriyinin nanceb tungguh sanganang sane jagi keangge upakara paetiwon punika jantos 12 rahina saking padewasan pangutangane turing sesampune ngermargiang upakara panyeeban
 - b. Kerama Banjar ngawit saking wawu lampus utawi yaning ngewangun ngawit saking ngeriyinin ngoreng sanganan sane jaga keangge upakara patetiwon punika jantos 3 rahina saking padewasan pangutanggane turing sesampun ngemargiang upakara pengebuan ring khayangan

- 2) Cuntaka/Sebel sangkaning Ngeraja Sewala :
 1. Sane keni cuntaka wantah deweknia tunggal, penganggenia lan genahnia aturu
 2. Suwenia sekantun ngemedalang rah, diastun sampun uwusan ngemedalang rah yan prade durng wenten 3 rahina tr dereng mabersih taler kantun kasinanggih cuntaka
- 3) Cuntaka/Sebel sangkaning madruwe Putra :
 1. Yayah Renania, Rarenia, Kuluwarga sajeroning paumahania lan umahnia
 2. Suwening cuntaka :
 - a. Sang Yayah kuluwargan sane wenten ring sajeroning karang paumahan gumentos kepus odel
 - b. Renaming Rare akambuhan (42 rahina) tur sesampun maprayascita
 - c. Yayah lan kulawarga tunggil apaon 12 rahina
- 4) Cuntaka/Sebel saking keruron :
 1. Saking ipun 12 rahina tur sesampun maparisuda
 2. Deweknia, Somahnia, Umahnia lan Penganggenia
- 5) Cuntaka/Sebel sangkaning perabian :
 1. Sang merabian saha genahnia
 2. Suwenia gumentos kemargiang upacara Pesakapan
- 6) Cuntaka//Sebel Gamia Gumana :
 1. Sang melaksana (Lanang Istri) lan Desa Adat
 2. Suwenia gumentos kepalasang tur keprayascita deweknia Desa Adat lan Kahyangan sami sane magenah sajaroning Desa Adat Tengkulak Kelod
- 7) Sebel sangkaning salah timpal :
 1. Sang melaksana lan Desa Adat
 2. Suwenia gumentos sang melaksana meprayascita ring segara miwah ngemargiang pemerayascita jagat (Desa Adat Tengkulak Kelod)
- 8) Beling Deha :
 1. Sang beling saha genahnia aturu
 2. Suwenia gumentos mabiakawonan tur ngemargiang pemerayascita ring Khayangan
- 9) Bebinjat :
 1. Meme lan pianaknyane
 2. Salami dereng nenten mameras piananknyane lan memarayasvita deweknyane (meme lan pianaknyane)

10) Mitra ngalang :

1. Deweknia makakalih (lanang Istri) lan genahnia
2. Gumentos meparayascita

11) Melaksana Sad Tatayi :

1. Deweknia nunggal
2. Gumentos meprayascita
3. Nenten kangkat dados Pandita miwah Pinandita

PALET 5

INDIK SASARADAN NGAWIT

PAWOS 56

Sajeroning ngambil kekaryan sane mabuat, bilih-bilih sane muatang pangerombo sane katah wantah kawenang nyarad kulawarga Desa Adat, sakemawon kaanutang agung alit kekaryane. Silih tunggil kekaryan sane kewenang nyarad warga Desa/Banjar/Tempekan inggih punika rikala ngewentenang Panca Yadnya, Ngingsirang umah, Gelebeg/Lumbung miwah sane lian-lianan sane kasinanggeh mabuat inggih punika :

1)Sajeroning ngemargiang Patetiwan wenang nyarad :

1. Kerama Banjar sami Lanang Istri rawuhing Taruna-Taruni lan robania sami
2. Kerama Banjar sami Lanang Istri lan Sekeha Teruna-Teruni
3. Kerama Banjar sami Lanang Istri
4. Kerama Banjar sami nyibakang inggih punika lanange kalih Banjar Tempekan lan istrine kalih Banjar Tempekan
5. Banjar Tempek, kalih Banjar Tempek utawi pinunas Banjar Tempek lanang istri

2)Sajeroning ngemargiang Panca Yadnya taler keanutang ring sor singgih yadnyane sane kemargiang saha pinunas sang madruwe lan penyanggrania

3)Nyarad rikalaning ngingsirang umah, gelebeng/lumbung/jineng miwah sane lianan taler keanutang ring abot dangan karyane tur penyanggrania

PALET 6

INDIK MANUSA YADNYA

PAWOS 57

1)Manusa Yadnya inggih punika upakara-upakara dharmaning manusa ngawit saking patemoning kama petak kelawan kama bang sajeroning garba jantos seda

2)Upakara kadi ring ajeng madudon sekadi ring sor :

1. Duk sang kama reka medal

2. Kepus odel
3. Roras rahina
4. Tutug kambuhan (42 rahina)
5. Tigang sasih
6. Pawetuan (Oton/Odalan) 6 sasih
7. Metatah/Mepandes
8. Mawiwahan/Nganten
9. Mawinten

3)Upakara inucap manut nista, madya lan utama sane maren keanutang ring kecaping sastra agama lan catur Dresta

PALET 7

INDIK BUTHA YADNYA

PAWOS 58

1)Bhuta Yadnya inggih punika upakara pabeakala ring pertiwi lan khayangan sarwa perani saha upakara-upakara ring kebutan

2)Upakarang ring sarwa perani luwire :

1. Ring sarwa tumuwuh rikala Tumpek Pengatag (Saniscara Kliwon)
2. Ring sarwa ingon-ingon rikala Tumpek Kandang (Saniscara Kliwon Uye)
3. Upakara Pekala-kalaan manusa manut wiguna kabawos Pabyakala

3)Upakara Pabyakala ring pertiwi, Khayagan lan babuthankewantanin Mecaru

4)Pecaruan inucap ajeng nista, madya, utama wiguna mekadi ring sor :

1. Eka Sata
2. Panca Sata
3. Panca Sanak
4. Resi Guna
5. Panca Kelud
6. Tawur Agung miwah sane lan-lianan

5)Sajeroning sane munggah ring ajeng taler kawentenang Upakara :

1. Ngejot/Masaiban utawi Yadnya Sesa nyabran wusan ngerateng
2. Mesapuh-saouh rikala pacang wali ring Pura

PAWOS 59

1)Nangken ngewarsa rikalaning Tilem Kesanga kawentenang upacara Tawur Kesanga sane dudonan ipun mekadi ring sor :

1. Ring pengelong ping 13 Ida Bhatara sami katuran Melis/Melasti ke Segara utawi ring pammedal tertane lianan

2. Yan prade ring rahina inucap rin ajeng sedek rahina pasah pelastiane punika kemargiang ring rahina Tilem kesanga ketah kebawos makacihna pacang mapag rahina Panyepian benjangne
- 2)Upacara Panyepian sane kemargiang antuk I Kerama Desa Adat Tengkulak Kelod luwire :
1. Amati Geni, tan kengin meapi-api
 2. Amati Karya, tan kengin nyambut karya
 3. Amati Lelanguan, tan kengin maoneng-onengan, masuara gora lan sapanunggilania
 4. Amati Lelungan, tan kengin medal saking Puri utawi umahnia soang-soang
- 3)Bebratan inucap kemargiang saking semeng jantos benjang semeng/ndag surya raris kasuarang kulkul makacihna pangembak
- 4)Sang amurug kecaping ajeng keni pamidande manut pararem kemargiang antuk Patelik (Pealang Desa)
- 5)Riwus rahina nyepi (Benjangne) makacihna pengawit icaka warsa patut soang-soang warga Desa Maturan ring Merajan ngelantur masimakrama

SARGA V

SUKERTA TATA PAWONGAN

PALET 1

INDIK PAWIWAHAN

PAWOS 60

- 1)Pawiwahan inggih punika patemoning purusa predana melarapan panunggelan kayun sukacita kadulurin upasaksi sekala lan niskala
- 2)Pelaksanaan pawiwahan luwire :
 1. Pepadikan kemanggalain antuk pakrunan
 2. Ngerorod, ngrangkat rihin wawu kakrunayang
 3. Nyeburan riantukan wadone manggeh sentana rajeg
- 3)Pedabdab sang sane pacang mawiwahan patut :
 1. Sampun manggeh daha Teruna (Prasida nganutin Undang-Undang)
 2. Sangkaning pada rena (Tan kepaksa)
 3. Nganut kecaping agama (Tan Gamia Gemana)
 4. Kawisuudayang (Sudi Wadani) peade pengambile tiwos agama miwah kepatiwangi
- 4)Pemargin pawiwahane mangda taler nganutin Undang-Undang perkawinan saking sang ngawinang

PAWOS 61

1) Pawiwahan sane kepatutang ring Desa Adat Tengkulak Kelod sekadi ring sor :

1. Sampun kemargiang pabyakalan utawi pesakapan kesinaksiang ring sekala niskala antuk Pinandita
2. Wenten saksi Parajuru sane ngilikita sang mawiwaha
3. Sampun matengeran suaran kulkul

PAWOS 62

Tata polahe marabian patut ipun sekadi ring sor :

1) Sapasira ugi pacang ngewarangang pakuluwarga patut mesadok ring Parajuru, selanturnia juru punika mapitetes manut tan manut kecap perabiane

2) Pemargin pepadikane anut dudonan :

1. a. Kapertama antuk sedah sejangkepnyane maka tatakan pakurenan
b. Kaping kalih taler antuk sedah saha polahe mekadi ring luwur sakemawon maweweh antuk canang sesantun lan ajman maka tatakan atur piuning ring sanggah kemulan wadone, yan prade pakurenane sampun katerima antuk kulawarga wadone
c. Kaping tiga polahe taler pateh sekadi sane kaping kalih sakemawon upakaran ipun malianan inggih punika ngangge upakara pejati matatujon mejatiang sang kakrunayang mepamit ring Bhetara-Bhetari lan Dewa Hyangnyane, ngawit saking rahina punika sang kakrunayang nenten kantun kawub antuk kulawargania, duwaning sampun keambil antuk sang meraga purusa
2. Selantur ipun riampun rawuh padewasan raris kelanturang antuk upacara pewartang-warang
3. Upacarane sane pinih untat mantuka ring kulawarga wadone wenten sane mewasta Merarapan utawi Megagapan inggih punika antene lanang wadon saha katututin antuk kulawargania budal kaumah wadone pecak saha makta rarapan merupa anaman bantal sane pacang kawehin kulawarga wadone saha canang daksina ajuman sesantun lan jauman sane jaga katur ring sanggah kulawarga wadone

3) Prade ngarorod/ngerangkat patut :

1. Reraman lanange ngawentenang pamilaku melarapan antuk duta sekirania 2(kalih) diri mirdatayang ring reraman wadone sane keangkatan
2. Pagenahan antene tan kangin ring dunungan/paumahan sang lanang sedereng mabyakala

4) Sajeroning pakrunan/pangelukuan patut :

1. Kemanggalian antuk geng sinampura ring reraman wadone
2. Keiguman bawos indik pakidih utawi kapelegayang arep ring pasewakan sang sane kaedih saha kebawos pewartangane riwekas
3. Kacihnayang indik keparusane prade wadone keajegang, dados kepatutang lanange sane kaedih kebawos pawiwahan nyeburang
4. Prade pamelepehe tan katerima pakrunane taler kemargiang jantos ping tiga selantur ipun pewartangane manggeh kemargiang
5. Pekerabkambean mapitegau upacara tinas apadang (puput) mapikuren duwaning manut sekadi : Sajeroning kebawos ambe kelaksanayang ring sekala niskala antuk serana jauman miwah Widhi Widiana
 - a. Jauman, pinaka ngambe/ngadungan kayun soang-soang pakulawarga wadone
 - b. Widhi Widiana Pejati, satmaka mejatiang sajeroning niskala nunas wadone ring pamerajan Kamulania
 - c. Ngaturang Widhi Widana Pekandelan ring Pura Puseh matetuek mangda kalugra mekandelin Ida Bhatara saha dados munggah ring Bale Agung saha kesaksinin olih Parajuru

PALET 2

INDIK NYAPIAN

PAWOS 63

- 1) Perabiane/Pakurenane prasida kawusang melarapan antuk palas silih tunggil padem/seda
- 2) Palas perabiane wenten kalih pawos inggih punika sangkaning pada lila miwah wiyit wicara
- 3) Sang ayat palas merabian patut atur supeksa rihin ring sang rumawos (Pengadilan Negeri) risampun tinas apadang pamutuse kebawos nyapian wawu I Parajuru nyarwakang, kawentenia ring Desa saha kekaninin panebas kulku! manut perarem

PAWOS 64

Tatacara palas merabian sangkaning pada lila sekadi ring sor :

- 1) Pagunakayan polih paha pada
- 2) Pabekel/Tatadan soang-soang kewawa niri-niri, warisan kewawa antuk sang manggeh purusa

- 3)Nyekolahang miwah ngupapira pratisentana manut swadarmaning guru rupaka patut kelaksanayang olih Guru Rupaka/purusa

PAWOS 65

Prade riwekas sang palas kecihna adung malih patut :

- 1)Ngelaksanayang pawiwahan malih
- 2)Keni pamidanda nikel saking palase, wit palase pecak sangkaning pada lila

PAWOS 66

1)Sang balu kabinayang dados kalih :

1. Balu Istri wit sentana (Sentana Rajeg) miwah balu Istri boya sentana
2. Balu Lanang kapurusa (wit sentana) miwah Balu Nyeburin (Boya Sentana)

2)Swadharmaning Balu inucap patut :

1. Ngemanggehang patibrata tan kangin melaksana paradara utawi dratikrama
2. Nguasayang waris, pagunakayan, tan dados ngadol, ngadeang, makidihang lan sane tiwosan sejawaning saking bebasang wekania utawi kulawargania sane pinih tampek saking purusa yan prada wekania kantun alit-alit
3. Kangin ngedih sentanan prade wenten pidabdab sadurung sinalih tunggil lampus saha kabebasang antuk kulawargania sane kasinanggeh kapurusa
4. Kewenang malih mawiwaha prade wenten kabebasan manut angka 2 ring ajeng

PAWOS 67

Balu kaucap tan pageh sekadi ring sor :

- 1)Paradara/Dratikrama
- 2)Matilar saking pakubon tan masadok jantos 6 sasih
- 3)Lempas ring swadharma sewos-sewosan, tan prasida ngehehin solah maprakerti arep ring pituduh kulawarga purusa

PALET 3

INDIK SENTANA

PAWOS 68

- 1)Sentana wenten tigang pawos sane kaucap Pretisentana Lanang, Pretisentana Wadon (Rajeg) miwah Sentana Paperasun
- 2)Pretisentana inggih punika : sentana sane metu saking pawiwahan kepatut

3)Prade pawiwahane tan patut ngawetuang sentana mangda tan kantun kewastanin bebinjat utawi astra yogya kemanggalain antuk penyangaskara

4)Prade pawiwahane tan ngewetuang sentana kengin ngedih sentana antuk upasaksi sekala niskala kewastanin sentana paperasan saha saking kulawarga

sane pinih tampek pakilitan ipun, pamekas sane saking purusa. Yan tan wenten saking purusa kawenang saking wadon miwah sane lianan

PAWOS 69

1)Ngadegang sentana manut dudonan patut maserama antuk upakara pamerasan saha kasinaksiang ring sekala niskala

2)Sapa sira ugi I Kerama sane pacang ngedih sentana patut mesadok ring Bendesa sanistan ipun asasih sadereng pamerasan

3)I Bendesa kasuksikin antuk I kelihan Banjar mangda digelis Nyarwakang ring wewidangan Desane sang sapa sira ugi rumasa tan lila mangda digelis nyadokang masenger kalih wuku sadereng pamerasan

4)Jurun Desa digelis mawosan saha ngicenin pamutus nepek ring Catur Dresta miwah perarem

5)Prade sulur paperasane ten manut ring kecaping ajeng, jurun Desa wenang ngandeg sang pacang mameras saha ngicenin pamutus mangda kaputusan rihin bebawosane sulur utawi wicaranya

PAWOS 70

1)Paperasa sane sampun kabawos patut ring Desa Adat Tengkulak Kelod inggih punika risampun mahkecihna :

1. Ngelaksanayang Widhi Widhana paperasan
2. Kesinaksiang antuk Jurun Desa sane jaga ngilikitayang
3. Kejarwakang ring wawidangan Desane

2)Sane kepatutang keangge sentana sekadi ring sor :

1. Nginutin agama Hindhu
2. Kulawarga saking purusa prade tan wenten kengin sakeng wadon yaning taler tan wawu kengin saking anak lianan

3)Kengin ngadegang sentana langkungan ring adiri lanang wiadin wadon

4)Kang sinanggeh warisan luwire :

1. Duwe tengah mekadi : Tegal/Carik, Karang ayahan Desa, Kahyangan
2. Pemerajan/Sanggah
3. Pagunakayan, tadtadan/jiwadana, hutang piutang muang sane lianan

5)Wawu kengin kabawos warisan prade wenten :

1. Sang mapiturun (Pewaris)
2. Katurunan (Akhli Waris)
3. Artha berana miwah tategenan (Ayah-ayahan) makecihna warisan

PAWOS 71

1)Sang kasinanggeh warisan luwir ipun :

1. Pretisentana purusa
2. Pretisentana predana (Sentana Rajeg)
3. Sentana paperasan Lanang/Wadon

2)Prade tan wenten sekadi ring ajeng kang sinanggah waris inggih punika :

1. Turunan purusa pernah munggah mekadi rerama misan wadon
2. Turunan purusa pernah munggah kesamping mekadi keponakan misan mindon

PAWOS 72

Swadharmaning waris patut :

- 1)Nerima saha nguasayang tetamian pahan saking keluhurania mekadi merajan/sanggah, Pura saha pangupakarania miwah nyeledehin ayah-ayah pewaris
- 2)Ngabenang pewaris saha ngelanturang upacara-upacara Pitra Yadnyania
- 3)Nuwurin hutang-hutang pewaris manut pangelukika

PAWOS 73

Pangepahan warisan manut sekadi ring sor :

- 1)Risampun kelaksanayang upacara Pitra Yadnya lan hutang-hutang pewaris buntas sami ketawur
- 2)Para waris polih pahan artha berana lan pada ngayah
- 3)Sinalih tunggil waris kengin tan polih pahan prade :
 1. Nilar kawitan lan sesananing agama
 2. Alpaca guru rupaka
 3. Sentana rajeg kesah mawiwah utawi dados pretisentana nyeburin soang-soang kebawos Ninggal Kedaton
- 4)Boya dados waris taler polih upon-upon anut dudonan luwire :
 1. Sentana Luh selami dereng kesah mawiwah utawi alpaca guru
 2. Balu Luh wiadin muani Nyeburin (soang-soang boya sentana)
 3. Mulih Daha utawi Taruna riantukan ring pawiwahane pecak sampun kebawos ninggal sentana taler nenten kantun kasungguh sentana

5)Pewaris kengin maweweh rikala maurip pinaka jiwa dana, tadtadan/beke! makacihna paweweh tetep ring pianaknia sane kesah mawiwaha

PAWOS 74

1)Prade ring sajeroning pakuliwarga weten wariis langkungan ring adiri patut :

1. Kawentenang paiguman indik pedum waris inucap
2. Yan tan prasida, katunasang tatimbang ring Parajuru kengin katumusang ring sang Rumawos (Pengadilan Negeri)

2)Prade jantos karang Desa kepah utawi kasepih patut soang-soang nedunin Makeramaa Desa Ngarep taler kengin meganti

3)Prade karang inucap kaputungan patut Parajuru nimbakang ring :

1. Sang sinanggih waris manut pawoa 73
2. Sang kengin angge sentane manut pawos 71 (2) miwah (3)
3. Prade taler ten wenten cumpu ring panepas Kerta Desa kengin katumusang ring sang rumawos (Pengadilan Negeri)

SARGA VI

WICARA LAN PAMIDANDA

PALET 1

INDIK WICARA

PAWOS 75

1)Sane wenang mawosin mekadi mutusang wicara ring Desa inggih pnika Jurun Desa sane kasinanggeh Kertha Desa

2)Prade sang mawicara tan wenten cumpu ring sang rumawos Desa Adat minakdi Kertha Desane kengin nunasang wicara inucap ring sang rumawos (Pengadilan Negeri)

PAWOS 76

1)Sehanan wicara mawiwit kacorahang sakaluwir kasinanggeh nungkasang daging Awig-awig, Paswara miwah Perarem Desa/Banjar Parajuru patut digeliis mawosin tan nyantos pesadok

2)Sejabaning wicara sekadi ring ajeng patut nyantosang pesdok sang nunas bebawos

3)Panepase patut pastika nyantunang iwang patut melarapang Ti Premana (Saksi, Ilikita, Bukti) miwah tan maren nepek ring Catur Dresta

PALET 2

INDIK PAMIDANDA

PAWOS 77

- 1)Desa/Banjar niwakang pamidanda ring warga Desa sane sisip
- 2)Patiwak inucap kelaksanayang olih Bendesa/Kelihan Banjar
- 3)Bacakan Pamidanda luwire :
 1. Ayahan panukun kasisipan
 2. Danda artha (Dosa danda saha panikel-panikelnia miwah panikel-panikel paturunan)
 3. Rerampagan
 4. Penyangaskaran
- 4)Pamidanda sane katiwakang patut masor singgih manut ring kasisipania
- 5)Jinah utawi raja berana pamidanda punika ngeranjing dados druwen Desa/Banjar

PALET 3

INDIK RERAMPAGAN

PAWOS 78

- 1)Kerama sane langkungan ring tigang paruman ngelantur tan nawur patrungan miwah dadendan wenang kerampag
- 2)Polahe ngerampag tatacan ipun sekadi ring sor :
 1. Kelaksanayang antuk Juru kesarengan Desa/Kerama sekeha tigang diri maka saksi
 2. Sang ngerampag sangkaning darsana ngambilbarang butawi nyawenin tanem tuwuh akehnia manut ring pengargan hutang sang kerampag
 3. Parajuru miteketang mangda barang-barang sane kerampag digelis katebus masenger awuku ring kutus rahina pacang keadol
 4. Tan nganinin saluwir barang sane patut kainggilang manut Agama miwah mademang pangupajiwa sang kerampag
- 3)Prade sang pacang kerampag ngewara (ngalangin) diastun sampun nganutin Awig-awig Desa Adat Tengkulak Kelod punika wenang karang Desa sane kagenahin kedaut antuk I Kerama Desa
- 4)Pamidanda inucap ring ajeng sami buntas risampun sang kekaninin :
 1. Nunas geng pengampura ring Kerama Desa riantukan nguak pasubayan (pararem)
 2. Nawur pengargan penguak payubayan duk pacang kerampag kadulurin antuk pemerayascita penyapsap kaiwangan ring Desa

PALET 4
INDIK PECAMIL
PAWOS 79

Sehananing rancangan/bebawos utawi kekaryan sane sampun kemanggehang tur kaingkupin ring Paruman olih I Kerama Desa/Banjar mewastu silih tunggil Kerama sane ngucapang rancangan bebawos utawi kekaryan punika nenten patut, wong inucap kekaninin pamidanda pecamil manutin paswara

SARGA VII
PERAREM LAN PASWARA
PAWOS 80

- 1) Paruman Desa utawi Banjar patut ngamedalang perarem-perarem anggeang mategepin Awignia nunggal-nunggal manut dudonan
- 2) Daging sehanan perarem patut saeloan ring daging Awig-awig
- 3) Sane patut kaungguhang ring perarem mminekadi ipun :
 1. Dewasa ngawitin kasobiahang daging awig-awig lan sane mabut
 2. Kerincikan bacakan daging awig-awig sane mabuat
 3. Agung alit pamidanda daging panikel-panikel lan selantur ipun
 4. Tatesulur ngemargiang daging awig-awig
 5. Sehanan indik sane siwosan sane wenten kalitan ipun maka pamitagep daging awig-awig punika

PAWOS 81

- 1) Paruman Parajuru tan maren patut :
 1. Saeloan ring daging awig-awig lan perarem-perarem
 2. Manut ring Adat, Agama, Sastra Loka miwah Desa Drasta
 3. Pastika nyantenang Dewasa pengwit pemarginia
 4. Nyantenang agung alit pamidandania yan kapurung

SARGA VIII
NGUWAH NGUWIHIN AWIG-AWIG

PAWOS 82

- 1) Nguwah-Nguwihin Awig-awig Desa puniki kelaksanayang antuk paruman Desa
- 2) Awig-awig puniki kemargiang ngawit kaingkupan (kereremin)

PAWOS 83

- 1) Sakaluwiring sane pecak sampun naen wenten patut keanutang ring daging awig-awig puniki

2) Sakaluwiring sane during kaunggahang sajeroning awig-awig puniki patut kelaksanayang manut tatacara sane sampun ketah memargi kadulurin antuk pareman-pareman

SARGA IX

PAMUPUT

PAWOS 84

Bendesa/Kelihan Banjar Adat rikala ngemargiang daging awig-awig miwah usaha Desa patut tan maren :

- 1) Saeloan utawi mawirasa ring sehanan Parajuru sane taler ngawawenangan warga Desane Kelihan Banjar miwah Pekaseh
- 2) Ngawentenang galah mantuka ring warga Desa mangda warga Desane polih ngupadi pangupa jiwa nincapang pangaweruh miwah usaha niri-niri sewosan

PAWOS 85

- 1) Awig-awig puniki kasobiahang duk rahina Budha Kliwon Sinta tanggal ping 11 sasih Jesta Icaka warsa 1910, tanggal masehi 21 Juni 1990 ring Wantilan Desa Adat Tengkulak Kelod
- 2) Awig-awig puniki kalinggatanganin antuk Bendesa Adat Kesarengin Kelihan Banjar saha kesaksiang antuk Kepala Desa Kemenuh
- 3) Luwire sang ngalinggatanganin :

Bendesa Adat Tengkulak Kelod

Kelihan Banjar Adat
Tengkulak Kelod

(I Dewa Nyoman Jiwa)

(I Ketut Remben)

Saksi

Kepala Desa Kemenuh

(Ida Bagus Marka)